

involucrum duplo superantibus; foliis profunde inciso-dentatis pinnatifidisve, radicalibus obverse et anguste oblongo-lanceolatis, apice subacutis, caulinis angustioribus, superioribus linearibus integris apice attenuatis; caule erecto, a basi vel superne tantum ramoso, ramis erecto-patulis subdiffusis.

Hab. in incultis Hispaniæ occidentalis: circa *Oviedo*.

A *T. concolore* differt foliis valde angustioribus et profundius dentatis, habitu tenuiore. Ligulæ sunt lætius sulfureæ et ad apicem dentium puncto rubello plerumque insignitæ, et involucrum imo apice fuscens.

TOLPIS DICHROA, calyculi foliolis involucrum vix æquantibus; capitulis discoloribus, ligulis centralibus fusco-purpureis, exterioribus sulfureis involucrum vix superantibus; foliis sat crebre dentatis, anguste oblongo-lanceolatis, apice acutis, caulinis angustioribus, superioribus linearibus integris; caule erecto, ramoso, ramis erecto-patulis apice cano-furfuraceis.

Hab. in incultis Galliæ australis: *Celles-les-Bains* prope *La Voulte (Ardèche)*.

Habitu ad *T. concolorem* accedit; ab hac autem involucro crassiore æque lato ac longo calyculum et akenii setas superante, foliisque angustioribus profundius dentatis, præter capitulum discolor, haud ægre discernitur.

TOLPIS DISCOLOR, calyculi foliolis involucrum conspicue superantibus; capitulis discoloribus, ligulis centralibus atropurpureis, exterioribus sulfureis, involucro longioribus; foliis remote inciso-dentatis, radicalibus anguste lanceolatis acutis, caulinis angustioribus, supremis basi et apice eximie attenuatis; caule erecto ramoso, ramis erecto-patulis.

Hab. in incultis Galliæ australis: *Béziers (Hérault)*.

A proxima *T. dichroa* recedit foliis angustioribus, remotius dentatis, calyculo longiore involucrum superante, ligulisque involucrum magis excedentibus.

*T. bætica* Mill., Dict., n° 3. — *T. barbata* Gært. — *Crepis barbata* L., ex parte, in Lusitania Hispaniaque crescens et etiam in Gallia, ex spe-

ciminibus prope *Perpignan* lectis et in herbario dom. E. Miciol visis, a præcedentibus speciebus, et præsertim a duabus ultimis, quibus capitulis discoloribus propior, facile distinguitur calyculi foliolis involucrum longe superantibus, capitulis valde amplioribus, et akeniis plerumque bisetis nec quadrisetis.

*Tolpis barbata* Reich., *Ic. flor. germ.*, 1359, n° 1, ad *Tolpidem bæticam* minime spectat, ut cl. Willkomm et Lange in *Prodr. flor. hisp.* immerito citant, sed potius *T. discolori* nostræ congruit.

*T. barbata* Biv. Bern., *Monogr. delle Tolpide*, p. XIII, tab. 3, quæ capitulis centro atropurpureis prædita est, ad *T. bæticam* non accedit. Eam Bertolonius ad *T. umbellatam* suam, propter akenia quadriseta, in *Flor. ital.* VIII, p. 54, ut synonymum refert; sed a speciebus nostris supra descriptis pluribus notis discrepat. A *T. discolori* et *T. dichroa* differt foliis conspicue latioribus, caule magis foliato robustiore, capitulisque majoribus. *T. Bivonæ* nomine designandam censemus. Specimina gallica prope *Cannes (Alpes maritimes)* lecta vidimus, ad hanc probabiliter referenda.

*T. quadriarista* Biv. Bern., *loc. cit.* p. IX, t. I. — Guss. *Syn. flor. sic.*, II, p. 415, ad *T. umbellatam*, in Bertol., *Flor. ital.* VIII, p. 54, pessime relata, speciem sistit a præcedentibus abunde diversam.

---

***Odontis* Hall. species. — Grex *Euphrasie*  
*viscosæ* L.**

ODONTITES ALPESTRIS, racemis laxiusculis; calyce oblongo-obconico virente, pilis mixtis eglandulosis crebrioribus obtecto, vix ad medium bilabiato, lobis ovatis vel ovato-lanceolatis, acutiusculis; corollæ luteæ tubo incluso, labio superiore apice truncato, labii inferioris lobo intermedio aperte emarginato; stylo glabro, vix basi pilosiusculo; capsula calycem paulo excedente, fere obovata, apice haud emarginata; foliis patentibus demum subdeflexis, lineari-lanceolatis, acutis, integris vel utroque margine dente unico præditis, viridibus, undique pilis brevibus sparsis glanduliferis obsitis; caule a basi declinata ascendente, surrecto, stricto, pilis glandulosis pubesque minuta subreversa eglandulosa obtecto, ramosissimo, ramis erecto-patulis.

Hab. in sylvis montium Galliæ orientalis: *Briançon (Hautes-Alpes)*.